

M538: (Buch) Daniel

0,2 prologus
0,3 Aller engel wunne
0,4 D' wisheit ein tief brvnne
0,5 Ich armer zv dir vlihe .
0,6 In die schule ich zihe
0,7 Der du hoester meister bist
0,8 Got h're min d' da ist
0,9 Von dem vater entsprozzen
0,10 In marien gekozzen
0,11 Mit des heiligen geistes vluz
0,12 Gar ane menlichen schuz
0,13 Und ane swere geborn
0,14 Wand dv hast des vater zorn
0,15 Hin geleit in grozer list
0,16 Mit der martyr mittewist
0,17 Des lobe wir in sinnen
0,18 Dich h're vz vnd innen
0,19 Daz dv vns so meisterlich
0,20 Kanst leren . dar v-me ich
0,21 Zv diner schule kvme
0,22 Min sinne mir v'drume
0,23 In den werltlichen sachen
0,24 Geruche mich zv machen
0,25 Kvnstic vn- wisheit vol
0,26 Daz ich dir zv prise wol
0,27 Diz buch gemachen mvge
0,28 Zv dutsche . daz ez tuge
0,29 Der werlde wol zv lere
0,30 Dir geb ich h're ere
0,31 Wand dv ez alleine hast
0,32 Gemachet . vnd ich din gast
0,33 Zv eren den beschriben
0,34 Die da mit strit v'triben
0,35 Haben . vz pruzen lande
0,36 Abgote mancher hande
0,37 Mit ritterlichem swerte
0,38 So lange ez do werte
0,39 Daz d' geloube bluet

0,40 In deme lande gluet
0,41 Ouch gotliche caritas
0,42 Die bevor / e / nicht en was
0,43 Von den gotlichen heren
0,44 Ir heil sich immer meren
0,45 Sal . in d' werlde cluse
0,46 Von deme dutsche huse
0,47 Nennet man sie eigentlich
0,48 H're got dv zv en sich
0,49 Vnd gib en ewic wesin
0,50 Vertrib d' sunden vesen
0,51 Von en hie vf d' erden
0,52 Laz sie dort mit den werden
0,53 In himelriche leben
0,54 Nv wil ich vurbaz eben
0,55 Vch allen bitten daz ir
0,56 Sullet gar v'tragen mir
0,57 Ob ich die ryme breche
0,58 Daz dutsch nicht rechte spreche
0,59 Doch wil ich ez bewaren
0,60 Wand ich bi minen iaren
0,61 Nie dutsche buch gemachet
0,62 Habe . da von nicht sacht
0,63 Zv mir . die v'gezzenheit
0,64 Ich bitte die reine meit
0,65 Die da gebar ane we
0,66 Von deme suzen ave
0,67 Vnsern h'ren den waren
0,68 Got . daz sie mich volvaren
0,69 Laze in minem willen
0,70 Vz deme buche billen
0,71 Mit miner zvngen einen
0,72 Danyelem den reinen
0,73 Den got von der lewen mvnt
0,74 Machte zeichenlich gesunt
0,75 Er ist ein ppheta war
0,76 Got im machte offenbar
0,77 Manic wund' in sichte
0,78 Dar vf ich mich nv schichte
0,79 Zv d' vzlegvng bar
0,80 Vnd des textis glosen war
0,81 Ich mich deme beuele
0,82 Vor vch ich en nicht hele
0,83 D' die ware wisheit ist
0,84 Des menschen kint ihesus crist
0,85 Dar v-me so bit ich nv
0,86 Ieglich sin gebete tv
0,87 Zv d' suzen milden mait

0,88 Cristi mvt' vnv'zait
0,89 Mit deme suzen aue Maria .
0,90 daz sie die vle
0,91 In uwerz h'zen mvnde
0,92 An se zv dirre stunde
0,93 Daz ir sun min anbegin
0,94 Si . ende mitten . d' sin
0,95 Des textis vzlegere
0,96 Der glosen meisterere
0,97 Nv hilf suze maria
0,98 Dv bist plena gracia
0,99 Geseint vor allen vrowen
0,100 Eya laz vns hie schowen
0,101 Din hulf in allen dingen
0,102 So mac vns wol gelingen
0,103 Alle sprichet amen
0,104 Vmme des geistes Incipit . Capit . p'mum . in liber hic Danyelis
0,105 Ez geschach in den ziten
0,106 Do ioachym vil witen
0,107 Herschte in iudeenlant
0,108 Ir kvnic was er genant
0,109 Des dritten iaris gewalt
0,110 Als man im hatte gezalt
0,111 Daz er in daz riche quam
0,112 Vnd entpfienç kvnglichen nam
0,113 Ierusalem belegen
0,114 Wart . mit vil manchem degen
0,115 Des kvnges von babylon
0,116 Sin name hatte den don
0,117 Er nabuchodonosor
0,118 Die stat hatte nv da vor
0,119 Ir zv eime viende groz
0,120 Got liez sines zornis sloz
0,121 Irgen vber die vesten
0,122 Sie wart den vordir gesten
0,123 Wand sie sich dar in rischte-
0,124 Mit sturme sie irwischen
0,125 Ouch den kvnic ioachym
0,126 Nabuchodonosor im
0,127 Den selben nam gevangen
0,128 Vurbaz wurden sie bangen
0,129 In daz hus daz gotis was
0,130 Dar vz namen sie die vaz
0,131 Guldin gut . die da waren
0,132 Zv lobe gote dem waren
0,133 Vnde vurten sie mit in
0,134 In daz lant sennaar hin
0,135 Nabuchodonosor hiez

0,136 Sin gebot man nicht en liez
0,137 Daz geveze tragen vort
0,138 Merende des gotis hort
0,139 D' sin was . vnd ouch die clus
0,140 Zieren sines gotis hus
0,141 Da erte er en mitte
0,142 Nach d' heidenen sitte
0,143 Vnd irbot im die wurde
0,144 Von sines h'zen girde
0,145 Dar nach im d' kvnic liez
0,146 Rufen affanes d' hiez
0,147 Gebot deme so daz er
0,148 Solde im nach siner ger
0,149 Nemen kindel wol gestalt
0,150 Knechtel cluc gar reine halt
0,151 Kvnstic wissende in zvcht
0,152 vo- d' israhelen vrucht
0,153 Die da weren vil rechte
0,154 Grozer kvnge geslechte
0,155 Dar zv andre kindelin
0,156 Edler h'ren mit en in
0,157 Deme kvnge zv dienste
0,158 Vf sins palasis hienste
0,159 Ouch solden sie gebruchen
0,160 Lerende in den buchen
0,161 Chaldeischer zvngen wort
0,162 Mit buchstaben . dar nach vort
0,163 Volbrachte affanes gar
0,164 Des kvnges mvt offenbar
0,165 Wand er hie ein pfleger was
0,166 Der reinen die daz palas
0,167 Solden treten dienstlich
0,168 Erende den kvnic rich
0,169 Nabuchodonosor nv
0,170 Satzte daz man morgens vrv
0,171 Vnd zv abende gebe n
0,172 Den kindelin zv leben
0,173 Von siner spise daz brot
0,174 Dar zv win von varwe rot
0,175 Als er ez as vnde transc
0,176 Vuete drier iare lanc
0,177 Dar nach solden sie in gen
0,178 Vor des kvnges antlitze sten
0,179 Dienende wol gezogen
0,180 Dem riche vnderbogen
0,181 Vnder dissien iungen was
0,182 Danyel ananyas
0,183 Mysahel azarias

0,184 In dem buche ich ez las
0,185 Sie waren von iuden kint
0,186 Ire namen wurden sint
0,187 Von irme pfleger v'kart
0,188 Danyel genennet wart
0,189 Baltasar . ananyas
0,190 Mit zvnamen hiez [...] [...]
0,191 Mysaheli wart mysach
0,192 Azaryam er den sprach
0,193 Abdenago zvnamen
0,194 Alsus sie gar volquamen .
0,195 Danyel nv vz irkoz
0,196 Gar von sines h'zen doz
0,197 Er wolde sich nicht meilen
0,198 Noch sinen lib v'geilen
0,199 Mit des kvniges spise
0,200 Die man en brechte lise
0,201 Von tische alda zv r kost
0,202 Nicht win trinken noch den most
0,203 D' da geschenket wurde
0,204 Ez duchte en ein burde
0,205 Siner sele vnd vnrat
0,206 Lieblich er den pfleger bat
0,207 Daz er en reine hielde
0,208 Vnd siner sele wielde
0,209 In kost d' im gezeme
0,210 Des kvnges zv im neme
0,211 Selber d' im gebruchte
0,212 Secht wi en got beruchte
0,213 Mit gewalden die er vant
0,214 An sime meistre alzvphant
0,215 Wand er in sin h'ze brach
0,216 Liebende . d' pfleger sprach
0,217 "Danyel vil lieber svn
0,218 Wie turst ich daz immer tvn
0,219 Vor deme kvnge heren
0,220 Er wurde mir ez keren
0,221 Zv arge vnd abwitze
0,222 Ob er vwer antlitze
0,223 Meger sehe d' andern
0,224 Die mit uch hine wandern
0,225 Vnd sich d' spise weiden
0,226 Von dem kvnge bescheiden
0,227 Ich mvste des entgelden
0,228 Man wurde mich beschelden"
0,229 Danyel do begunde
0,230 Kosen mit wisen mvnde
0,231 Kein malasar in gute

0,232 Wand er zv steter hute
0,233 Gegeben was danyeln
0,234 Ananye mysaheln
0,235 Azarie von eime
0,236 Vursten . d' ie in heime
0,237 Pflac zvchten die dienere
0,238 Daz sie wern wandils lere
0,239 Vlehelichen er en bat
0,240 "Versuche vns an d' tat
0,241 Zen tage dine knechte
0,242 Gib vns brot spise schlechte
0,243 Mvsil vnde wazzetranc
0,244 Warte danne ob wir cranc
0,245 Sin . von unsern genozen
0,246 Die kvnges spise ozen
0,247 Wie gut denne dunket dich
0,248 Mit vns tu des bitte ich ."
0,249 do disse rede v'nam
0,250 Malazar ir nicht irquam
0,251 Svnder er gezwihete
0,252 Gantz urlovb er lihete
0,253 Abe sin von dem aze
0,254 Dar zv des kvnges qaze
0,255 Versvchende daz geschach
0,256 Ir antlitze er besach
0,257 Nach des zenden tages ganc
0,258 Gotis hulde mit en ranc
0,259 Clar rot starc vetter sie waren
0,260 Me dan die andren baren
0,261 D' man pflac mit d' spise
0,262 Nach des kvniges wise
0,263 Dirre pfleger vurbaz me
0,264 Spisete sie als vor / e /
0,265 Von deme daz sie wolden
0,266 Die reinen gotisholden
0,267 Idoch nam er ir prunde
0,268 Da von sie solden blunde
0,269 Werden an des libes craft
0,270 Wol cluc dar zv sighaft
0,271 Im selben zv geverte
0,272 Als er die kindre nerte
0,273 Unser scheppfer d' gute
0,274 Mit genaden da hute
0,275 Lieblichen disser iungen
0,276 Er larte ire zvngen
0,277 Lesen in allen buchen
0,278 Kvnst wisheit zvcht wol suchen
0,279 Ie dem manne nach v'nvmft

0,280 In gotlicher lere kvmft
0,281 Danieli gegeben
0,282 Wart gar ein wises leben
0,283 Wand er konde berichten
0,284 Waz die trovme betichten
0,285 Ovch des hirnes gesichten
0,286 Horte man en beschichten
0,287 Nv waren volkvmen gar
0,288 Loufende u-me dri iar
0,289 Alle tage mit enzv
0,290 Nabuchodonosor nv
0,291 Hiez brengen die iungen vor
0,292 Sie folgten glich deme spor
0,293 Iris meisters vnd des pfat
0,294 Vor den kvnic er do trat
0,295 Opferte siner gewalt
0,296 Disse knechtel wol gestalt
0,297 D' kvnic sie an blicte
0,298 Sine wort er do schicte
0,299 Mit en redende wisheit
0,300 Niemand was so gar gereit
0,301 Zv berichten swaz ez was
0,302 In des kvniges palas
0,303 Vf aller leie vrage
0,304 Ich die alhie v'dage
0,305 Als disse viere waren .
0,306 an kvnsten offenbare-
0,307 Danyel . ananyas .
0,308 mysahel . azarias
0,309 Bi dem kvnge sie bliben
0,310 Wisheit wart da getriben
0,311 Gar uf aller leye wort
0,312 Kvnst witze v'nvmft gehort
0,313 Von en me wand bi keinen
0,314 Swes d' kvnic die reinen
0,315 Vragete daz was vol ant
0,316 Zwiuach man die wisheit vant
0,317 In en vor allen clugen .
0,318 die in dem riche truge-
0,319 Meisterlichen namen hoch
0,320 Danyel d' bleib idoch
0,321 Zv chaldeen al die zit
0,322 Bi wirde biz daz man sit
0,323 Schreib des ersten iaris zal
0,324 Des kvnges cyri anval
0,325 Riches vntz an darium
0,326 Hie ist des capitels drvm
0,327 Vernemt hie waz die glose

0,328 Mit vzlegene kose
0,329 IR habet wol vernvmen
0,330 Wie d' text her ist kvmen
0,331 Ersten an biz zv ende
0,332 Die glose got nv sende
0,333 Vch allen daz ir v'stet
0,334 Vzlegvnge wie die get
0,335 Vns namen des berichten
0,336 Zv m ersten an dem tichten
0,337 Stet nabuchodonosor
0,338 Lac irlm bevor
0,339 Vnd irkreic ioachim
0,340 Den kvnic gefangen im
0,341 Ouch berovbte er daz hus
0,342 Gotis vnde nam dar vs
0,343 Geveze . daz zv zierheit
0,344 In den tempel was geleit
0,345 Nabuchodonosor ist
0,346 Mit zvnamen mittewist
0,347 Gesprochen d' da sitzet
0,348 Betrubet vnde hitzet
0,349 Ewiglich in einer stat
0,350 Clage vnde iamer hat
0,351 Da ist vns bi bedutet
0,352 Der viant d' im butet
0,353 Menschen lib vn- sele
0,354 Zv grozer note quele
0,355 Vor irlm er lit
0,356 Vnkuschoen rat vnde nit
0,357 Gibt er . den vridesamen
0,358 Setzt er vor . sinen hamen
0,359 Daz er vahe ioachim
0,360 Dissen namen so v'nim
0,361 Er dutet d' da gote
0,362 Ist irhohet gebote
0,363 Odir eine vrevde ist
0,364 Hore mensche dv daz bist
0,365 Wand dich got gecronet hat
0,366 Glich kvngen mit wizer wat
0,367 Hie vf erden toufende
0,368 Den gelouben slovfende
0,369 An dich mit clarme cleide
0,370 Got vater svn die beide
0,371 Teilen mit dir iren geist
0,372 Ein got war . starc in volleist
0,373 Machen dich zv erben in
0,374 In dem riche . den gewin
0,375 Nidet die alde nater

0,376 Der tuuelische vater
0,377 Vnd vellet vor din h'ze
0,378 Mit aller sunden erze
0,379 Er vichtet tac vnde nach
0,380 Lust brengende dir mit macht
0,381 Biz dv dich gar v'tufest
0,382 Svnde mit sunden hufest
0,383 So bist v sin gefangen
0,384 Alle d' helle slangen
0,385 Rovben daz geveze fin
0,386 Demvt vz des h'zen schrin
0,387 Dar zv alle gute tat
0,388 Vz gotis tempel v'gat
0,389 Den paulus wiset rechte
0,390 Wand er die gotis knechte
0,391 Nennet gotliche raste
0,392 Dem werden hohen gaste
0,393 Wirt v'storet sin hus gar
0,394 Daz geveze vollen clar
0,395 Ist . andacht . vasten . beten
0,396 Kuscheit . zv r kirchen treten
0,397 Vben barmh'zikeit
0,398 Sulche zierheit was geleit
0,399 An din hus dri iar gezit
0,400 Dri zal versuchunge git
0,401 Der ersten stest v wid'
0,402 Die andre sitzet nider
0,403 In d' dritten veslest v
0,404 Wuste ist d' tempel nv
0,405 Wurden von des tuuels hant
0,406 Sin geveze in ein lant
0,407 Kvmen ist zv sennaar
0,408 Vnd bedutet stanc vor war
0,409 Sust bist v vnd'bogen
0,410 Des himels voit entzogen
0,411 Nach dir eigent danyel
0,412 Ananyas mysahel
0,413 Azarias disse kint
0,414 Groze bedutnisse sint
0,415 Cristen gotis gerichte
0,416 Danyel ich zv pflichte
0,417 Ananyam genade
0,418 Azarias gerade
0,419 Heizet hulfe od' craft
0,420 Mysahel heizet heilhaft
0,421 Man spiset disse mit kost
0,422 Diner werke die dv host
0,423 Ruwiges h'zen volbracht

0,424 E dv in d' sunden nacht
0,425 Geviele . gantzer iar dri
0,426 Gibit man ir spise vri
0,427 Biz dv dich wilt irkennen
0,428 Got vnsern h'ren nennen
0,429 Wider keren mit buzen
0,430 Wallen zv cristes vuzen
0,431 Weinen clagen daz dv bist
0,432 Gevallen in d' sunden mist
0,433 Bichten gantze ruwe han
0,434 Vurbaz me die sunde lan
0,435 Dir wirt got vil genedic
0,436 Nv mvzen vor den anblic
0,437 Des kvniges von babylon
0,438 Iene kindelin da von
0,439 Wand dri iar gantz v'gangen
0,440 Sint . des mvzen sie langen
0,441 Deme kvnge ire kvnst
0,442 Sich von ires h'ren gvnt
0,443 Ist ire wisheit so groz
0,444 Daz en niemant mac genoz
0,445 Wesen vnder den clugen
0,446 Die dinen lib v'trugen
0,447 Mit velschlichem rate wec
0,448 Verre von des himels stec
0,449 Ir wisheit dich gar vrihet
0,450 Wand en d' vient lihet
0,451 War sin alle ire wort
0,452 Wo sie werden hin gehort
0,453 Danyel spricht danne vort
0,454 Sine rede ist gehort
0,455 "Gerichte bin ich gotis
0,456 Gantz . des sinen gebotis
0,457 Den menschen schuf er im glich
0,458 Erbe in dem himelrich
0,459 Gab er da ewiclichen
0,460 Nv ist abe gestrichen
0,461 Gar von tuuellicher list
0,462 Kvnich dv ez selber bist
0,463 Lant daz sin von ewen was
0,464 Des himelriches palas
0,465 Din ist d' mensche vor war
0,466 Malachyas offenbar
0,467 Der prophete beschribet
0,468 Gerichtes wort er tribet
0,469 Got vnser h're sprichet
0,470 Sich vnde dich er richet
0,471 "Ob d' gerechte vellet

0,472 In svnde . vnd gesellet
0,473 Zvtz im tvuellischer her
0,474 Siner gute wirt er ler
0,475 Wand ich ir v'gezzen wil
0,476 Ewiclich in deme zil
0,477 Sterbet er so er ist din
0,478 Noch sal andir urteil sin
0,479 Bekeret sich ein snoder
0,480 Svnd' . des lebens broder
0,481 Kegen mir in lieber pflicht
0,482 Me wil ich gedenken nicht
0,483 Svntlicher wort vnde tat
0,484 Die er ie begangen hat
0,485 Min ist d' . er was din gast
0,486 Nicht teiles dv an im hast
0,487 Verscheidet er . zv lone
0,488 Wirt im die himelschrone"
0,489 Ananyas vor brichet
0,490 Gnedeclich vn- sprichet
0,491 "Ich heize die genade
0,492 Den sund' ich entlade
0,493 Von aller leie burden
0,494 Vnd vz d' helle hurden
0,495 Wil ich en benemin dir
0,496 Entzwar gar nach miner gir
0,497 Geschriben stet gotis wort
0,498 "Swen d' sund' wirt gehort
0,499 Svftzen vm die missetat
0,500 Ruwe bichte buze hat
0,501 Dar an veste hie bestat
0,502 Glich nach sines vat' rat
0,503 Den bichtiger ich meine
0,504 Er wirt von svnden reine
0,505 Sam ein luter spiegelglas"
0,506 Zv mir nem ich daz din was"
0,507 Azarias brenget craft
0,508 Hulfte odir sigehaft
0,509 Ist er genant den rechten
0,510 Vor sie vil creftlich vechten
0,511 Wil er zv aller stunde
0,512 Begit mit wisem mvnde
0,513 "Tuuel laz den menschen gen
0,514 Ledic vnde vri besten
0,515 Got vater hat gesprochen
0,516 Durch dauitz mvnt gebrochen
0,517 "Ere vnde ruf mich an
0,518 Alle not mvz dich v'lan
0,519 Swie sie dich hat begriffen

0,520 Hin wec so sal sie schiffen
0,521 Wand ich wil irlosen dich
0,522 Von den stricken veterlich”
0,523 Tv lewe wec die claven
0,524 Den menschen wil ich haben .”
0,525 Mysahel d’ swiget nicht
0,526 Er ist heilsam ane wicht
0,527 “Gib mir vz diner gewalt”
0,528 Sprichet er . “den menschen kalt
0,529 Wermin wil ich en drate
0,530 Heilen gar von vnvlate
0,531 Sine sele vnd den lib
0,532 Hin wec din gespenste trib
0,533 Siech was er vnd ist gesunt
0,534 Ia sprichet iacobi mvnt
0,535 “Siechet iemant vnd’ uch
0,536 Der cristenheit pfaffen zuch
0,537 Zutz im daz sie vlehen got
0,538 Alzvphant d’ suche spot
0,539 Setzet sich in gesuntheit”
0,540 Durch des gelouben zierheit
0,541 Wil ich den menschen haben
0,542 In cristes blute laben
0,543 Dar zv mit dem brote fin
0,544 Spisen en nach siner pin
0,545 Nv laz arger vient die brut
0,546 Sie ist lieb . zart . vnde trut
0,547 Irme vridel den sie hat
0,548 Gesucht in d’ buze pfat
0,549 Vf dem wege in gazzen
0,550 Steteclich sunder lazzen
0,551 Varen zv himelriche
0,552 Ovch alle sorge wiche
0,553 Ewiclichen hin von ir .”
0,554 Nv sint die sechs namen dir
0,555 Vz geleget mit glosen
0,556 Vurbaz wil ich nv kosen
0,557 Aber von des textis lut
0,558 Smaghaft ist er als ein crut
0,559 Daz wol ruchet uber al
0,560 Suze mit d’ glosen gal
0,561 Daz andre capitel diz ist
0,562 Gnade h’re ihu crist
0,563 IN des andren iaris zal
0,564 Do man schreib wit ub’al
0,565 Als d’ kvnic wol irkant
0,566 Qam in sines riches lant
0,567 Nabuchodonosor slief

0,568 Ein swer troṽm im wid'ľief
0,569 Da von sin geist hart irqam
0,570 Vnd des troṽmes hugde nam
0,571 Er liez alle meistre wit
0,572 Berufen in einer zit
0,573 Sternseher vnd die zvkvmft
0,574 Sagen kvnden mit v'nvmt
0,575 Daz sie sich solden schichten
0,576 Des troṽmes en berichten
0,577 Mit siner bedutnisse
0,578 Ware vnde gewisse
0,579 Die meistre alle qamen
0,580 Vor den kvnic zvsamen
0,581 Als er sie hatte besant
0,582 Sine rede was gewant
0,583 Kegen en vil wol bedacht
0,584 Er sprach "ich in einer nacht
0,585 Slief uf mines bettis dovm
0,586 Min h'ze sach einen troṽm
0,587 Des der geist vil ser irschrac
0,588 Nicht ich sin gedenken mac
0,589 Wie er was da von saget
0,590 Mir den troṽm vnde iaget
0,591 Dar nach was er mvge sin
0,592 Dutende mir machet schin"
0,593 Antwort die meistre gaben
0,594 Vo m kvnge des entzaben
0,595 Gemeinlich vnde eben
0,596 Wunschten im ewic leben
0,597 Mutende dem kvnge zv
0,598 "Sage dinen knechten dv
0,599 Den troṽm . sich so welle wir
0,600 Alle wol vz legen dir"
0,601 D' kvnic sprach . "er ist wec
0,602 Ir envindet mir den stec
0,603 Des troṽmes vnd sin duten
0,604 Ich laz uch gar enthuten
0,605 Von dem leben vnd v'gen
0,606 Vwer huser mvzen sten
0,607 Wuste . dar zv an ere
0,608 Abir tut ir mir lere
0,609 An dem gesicht offenbar
0,610 Dar zv sin dutnisse war
0,611 So sult ir groz lon entpfan
0,612 Von mir wurde sundir wan
0,613 Mit gabe . vmbetraget
0,614 Den minen troṽm mir saget
0,615 Ouch die vzlegvnge sin"

0,616 Die meistre sprachen dar in
0,617 Zv dem andren male so
0,618 “Mache vns kvnt kvnic ho
0,619 Gesichte daz dir irschein
0,620 In dime slafe gar ein
0,621 Wir wellen ez beslichten
0,622 Vz legen . dich berichten”
0,623 Me d’ kvnic iagete
0,624 Den wisen er sagete
0,625 “Werlichen ich weiz vil gantz
0,626 Ir mich zihet vf den tantz
0,627 Vristende uwer tage
0,628 Tichtende eine sage
0,629 Vnwar vnde vol valscheit
0,630 Wol wizzet ir daz gereit
0,631 Mir entsliffen ist d’ sin
0,632 Zihen wellet ir mich hin
0,633 Biz mich armer mvt v’get
0,634 Todis urteil vf uch stet
0,635 Da von saget mir drate
0,636 Minen trovm d’ ein schate
0,637 Wurden ist . vnd dar zv me
0,638 Wie sin vzlegunge ge”
0,639 Antwort gaben die clugen
0,640 Mit suberlichen vugen
0,641 Deme kvnge aber zv
0,642 Sprachen . “wizze daz man nv
0,643 Vf ertriche vindet nicht
0,644 Lebende d’ die geschicht
0,645 Irkennen mvge in kvnst
0,646 Dar zv grozer kvnge gvnst
0,647 En vreget nicht die vrage
0,648 In so verlicher lage
0,649 Meistre . wand sie ist vnkvt
0,650 Gentzlich keines menschen mvnt
0,651 Kvndit den trovm vz geleit
0,652 Svndir d’ gote wisheit
0,653 Die mvgen dir en bringen
0,654 Vnd zv gehugde dringen”
0,655 Do d’ kvnic diz v’nam
0,656 Sam ein zornic lev / er / bram
0,657 Grimmeclichen vnd da von
0,658 Gebot er in babylon
0,659 Alle wisen irtoeten
0,660 Diz urteil vnd diz noeten
0,661 Wart bevolhen arioth
0,662 Hie von des kvnges gebot
0,663 Danyel ananyas

0,664 Mysahel azarias
0,665 Wurden gesuchet vor an
0,666 Wand man sie wolde tot slan
0,667 Danyel do vragete
0,668 Wislich vnde iagete
0,669 Dar nach daz im wurde schin
0,670 Durch waz disse groze pin
0,671 Were bereit den grisen
0,672 Von babylon den wisen
0,673 Arioth tet alle dinc
0,674 Im offenbar ane winc
0,675 Danyel do balde lief
0,676 Vor den kvnic vnde rief
0,677 Sprechende vleliche wort
0,678 "Beite tv nicht dissien mort
0,679 Gib mir vrist zv einer nacht
0,680 Daz ich mvge wol bedacht
0,681 Dich berichten swez dv wilt"
0,682 Zvhant wart ein vrideschilt
0,683 Gegeben . secht ein treten
0,684 Hvb sich heimwert zv beten
0,685 Mit siner kvmpanyen
0,686 Mante er got den vrien
0,687 Gedenken aller gute
0,688 Vnd im in sin gemvte
0,689 Lieze kvmen in d' nacht
0,690 Volleclich mit glosen macht
0,691 Den trovm . daz so manic man
0,692 Mochte lebende bestan
0,693 Got vater en gezwiete
0,694 Siner v'nvmft er liete
0,695 Gar die heimelichekeit
0,696 Irkennen . da von gemeit
0,697 Wart danyel . vnde sprach
0,698 "Gotis name manicvach
0,699 Si gelobit ewiglich
0,700 Wand er hat lan wizzen mich
0,701 Die v'dructen dinc vil gar
0,702 Craft wisheit sint sin vor war
0,703 Zit alder . mac er handeln
0,704 Riche lien vnde wandiln
0,705 Liecht ist er d' vinsterkeit"
0,706 Nv was danyel gereit
0,707 Vnde gienc zv aryoth
0,708 Bat en daz er lie die not
0,709 Bestan . vnde vurte in
0,710 Vor den kvnic mit im hin
0,711 Er welde mit dem heren

0,712 Ouch sinen zorn v'keren
0,713 Berichten swes er welde
0,714 In giengen do die helde
0,715 Bede vor den kvnic stan
0,716 "Ich han vunden einen man"
0,717 Sprach aryoth . "d' dir sal
0,718 Kvnden dines trovmes hal
0,719 Er ist vndir iuden kint
0,720 Die zv dir gevuret sint"
0,721 Nabuchodonosor saz
0,722 Danyeln er rede maz
0,723 Mit zvnamen baltasar
0,724 Ob er im mochte vor war
0,725 Gesagen des er gerte
0,726 Vz legende en lerte
0,727 Irkennen sin gesichte
0,728 Secht danyel do schichte
0,729 Kein dem kvnge sine gir
0,730 Sprechende geloube mir
0,731 Herre . daz alle clugen
0,732 In meisterlichen vugen
0,733 Dinen trovn nicht besinnen
0,734 Mvgen noch ouch gewinnen
0,735 Sin beduten ane spot
0,736 Svndir ein einiger got
0,737 Der in dem himle wonet
0,738 Wil dir gar vngelonet
0,739 Irscheinen kvmftige dinc
0,740 Hie in dirre werlde rinc
0,741 An des trovmes vnd'scheit
0,742 Hoir en nv . d' dir entgleit .
0,743 Dv kvnic wurdest trachten
0,744 Kvmftige dinc zv achten
0,745 Vf dime bette wehen
0,746 Waz noch mochte geschehen
0,747 Daz wolde dir entecken
0,748 D' alle dinc entplecken
0,749 Kan mit siner ceswen hant
0,750 Die dir waren vmbekant
0,751 Doch ist mir ez offenbar
0,752 Nicht von miner wisheit z war
0,753 Me da-ne hie d' andren
0,754 Die cluges lebnes wandren
0,755 Svndir daz dir kvnic hoch
0,756 Wurde kvnt vf waz sich zoch
0,757 Din gedanke in d' zit
0,758 Trovmgesichte also lit
0,759 Kvnic sich dich beduchte

0,760 Als dir din sinne luchte
0,761 Wie eine sule stuende
0,762 Vor dir gezieret bluende
0,763 Hoch . groz . in ougenblicken
0,764 Gruesam was ir schicken
0,765 Houbet hals von golde clar
0,766 Brust vnd arme silber gar
0,767 Corper huf edel erin
0,768 Die knie herte yserin
0,769 Ein teil d' vuze waren
0,770 Von ysene volvaren
0,771 Daz andir teil irdin was
0,772 Dannoeh sehes tv vurbas
0,773 Biz daz ein stein behende
0,774 Gebrochen wart ane hende
0,775 Vz eines berges gesloz
0,776 Nidervart zv tal er vloz
0,777 Vnde sluc die sule werde
0,778 An ir vuze ysen erde
0,779 Daz sie da vil gar zvbrast
0,780 Golt . silber . er . der selbe mast
0,781 Glich wart deme gestuppe
0,782 In sulcher wurde vppe
0,783 Vergienc die sule alle
0,784 Mit disses steines valle
0,785 Als d' stovb von winden tut
0,786 Des svmeres . dirre lut
0,787 Nichtesnicht wart me vunden
0,788 Nach dissen selben stunden
0,789 Der stein d' sich nider liez
0,790 Vnd die sule gar zvrstiez
0,791 Wart zv eime berge groz
0,792 Vullete die erde bloz
0,793 Hie ist kvnic d' trovvn din
0,794 Merke daz beduten sin
0,795 Kvnic d' kvnge dv bist
0,796 Wand dir hie gegeben ist
0,797 Von des himeles gote
0,798 Gewalt dime gebote
0,799 Die crone aller riche
0,800 Macht . wurde . hast v gliche
0,801 Vberal . da die lute
0,802 Wonen . in disser bute
0,803 Sint die tier . vogle glantz
0,804 Vnd'tenic dir vil gantz
0,805 Ouch in dinen henden sint
0,806 Beslozen irdische kint
0,807 Da von bist v h're min

0,808 Daz guldine hovbit phin
0,809 Nach dir wirt ein ander man
0,810 Din riche lieplich enpfan
0,811 Wirdeclichen besitzen
0,812 Doch nicht in sulchen witzen
0,813 Sam dv hast vil manche zit
0,814 Silber golde vndir lit
0,815 Aber entstet ein riche
0,816 Vil mechtic vnde riche
0,817 Ez wirt gewaldic werden
0,818 Der lute vnd d' erden
0,819 Vil vruchtber wirt sin ere
0,820 Herte ist ez von ere .
0,821 Ein riche dar nach vf gat
0,822 Isen glich ez hie bestat
0,823 Merke wie daz isen slet
0,824 Vor im nictesnicht bestet
0,825 Hevwet brichet swaz ez wil
0,826 So groz wirt des riches zil
0,827 Die andren ez v'terbet
0,828 Riche in riche erbet
0,829 Teilunge sehe dv sin
0,830 Irdin vnde yserin
0,831 An den vuzen hie und da
0,832 Wizze din riche her na
0,833 In zwei teil geteilet wirt
0,834 Wie ez isen doch gebirt
0,835 Creftic wirt daz eine gar
0,836 Vnd daz andre vellet z war
0,837 Nider sam des cleides sovm
0,838 Me beduten hat d' trovm
0,839 Gemischet was daz isen
0,840 Mit erden . die da risen
0,841 Von dem isen stete mvz
0,842 Sie werden setzen den vuz
0,843 Zv den luten in vruntschaft
0,844 Mengende . ez wirt nicht craft
0,845 Haben an den geberden
0,846 Als isen mit d' erden
0,847 Binnen des die riche gen
0,848 Des himels got let entsten
0,849 Ein ewic riche veste
0,850 Ez wirt entzwar daz beste
0,851 Den vrenden gibt er ez nicht
0,852 Svndir volke daz en gicht
0,853 Wesen rich . creftic milde
0,854 Sich dissés riches schilde
0,855 Verdrucken alle wirde

0,856 Vf ertriche in girde
0,857 Diz ist d' stein d' sich wuc
0,858 Von dem berge vnd zv sluc
0,859 Golt . silber . er . isen . glich
0,860 Dar zv gebrantis ertrich
0,861 Kvnich dir ist kvnt getan
0,862 Din trovm aller ane wan
0,863 Nicht von mir . doch von gote
0,864 Gewalt von sime gebote
0,865 Zv stet ane missewanc
0,866 Wand din h'ze dar nach ranc
0,867 Waz nach dir were kvmftic
0,868 Entlost ist des trovmes stric
0,869 Nabuchodonosor viel
0,870 Langes zv d' erden schiel
0,871 Vorwert vf sin antlize
0,872 In sines h'zen ritze
0,873 Bet er an danyelen
0,874 Opfer hiez er im zelen
0,875 Vn- den smac von wirouch
0,876 Secht do sprach d' kvnich ouch
0,877 Zv danye in d' vrist
0,878 "Werlichen uwer got ist
0,879 Vber alle gote ho
0,880 Kvnich d' kvnge also
0,881 Mir hat er gemachet kvnt
0,882 Daz in mime h'zen wunt
0,883 Lac . nv ist ez worden heil"
0,884 Dar nach ein vil michel teil
0,885 Gab er gabe mit eren
0,886 Danyelen mit eren
0,887 Wolde hohe achperkeit
0,888 Babylon wart im geleit
0,889 Vndertenich gebotes
0,890 Volgende sines roties
0,891 Solden sie tegelichen
0,892 Alle wisen gestrichen
0,893 Wurden im in sinen schoz
0,894 Er schuf en vurstengenoz
0,895 Lant . lute er im irbot
0,896 Danye was ein not
0,897 Disse rede vnde bat
0,898 Den kvnich daz er die stat
0,899 Lieze vnde ouch die lant
0,900 Wesen in d' schirme hant
0,901 Siner drier gesellen
0,902 Der kvnich liez sie stellen
0,903 In wurde . do daz geschach

0,904 Sydrach vnd er mysach
0,905 Dar zv ouch abdenago
0,906 Wonten in dem lande so
0,907 Bi des kvnges hove bleib
0,908 Danyel . wand er nicht treib
0,909 Keine dinc nach dirre
0,910 Des capitels ist nicht me
0,911 Nv sult ir horchen lise
0,912 Waz uch die glose wise
0,913 ABER sal vns gezemen
0,914 Horchen vnde v'nemen
0,915 Waz vns die glose scheine
0,916 Von deme texte reine .
0,917 Wand sie vrucht nv brengen wil
0,918 Vnsern h'zen vrevdenspil
0,919 Ich bit uch nv gedenken
0,920 Vil wol des trovmes lenken
0,921 Vorne an biz zv ende
0,922 Er was enzwar behende
0,923 Mit siner bedutnisse
0,924 Idoch ich noch v'misse
0,925 Geistlicher vzlegvnge
0,926 An danyelis zvnge
0,927 Die meistre des berichten
0,928 Vns . in gotlichem tichten
0,929 Horet nv die bedutnis
0,930 Ouch vzlegvnge gewis
0,931 Nabuchodonosor slief
0,932 Der name nvlichen lief
0,933 Bedeutende den argen
0,934 Voget d' helle zargen
0,935 Nach dem daz er verleite
0,936 Adamen evam scheite
0,937 Vz des paradysis lant
0,938 Da mitte was er bekant
0,939 Kvnic wesen vf erden
0,940 In sinen vngeberden
0,941 Treib er vil manche stoltzheit
0,942 Vbende d' werlde leit
0,943 Betrachten er begunde
0,944 Wer im nach disser stunde
0,945 Gemochte an gesigen
0,946 Sint d' mensche gedigen
0,947 Were im in sinen hort
0,948 Von des grozen gotis wort
0,949 Daz er hatte gesprochen
0,950 E der appil gebrochen
0,951 Wurde von vnser mvter

0,952 Evam . des todis vuter
0,953 Gab sie vns do sie en sach
0,954 Lvstic sin . got h're sprach
0,955 "Spiset uch aller vruchte
0,956 Paradysis genvchte
0,957 Sal uch vnd'tenic sin
0,958 Ane diz eine bovmenin
0,959 Si uch v'boten mit not
0,960 Sin vrucht gibt ewigen tot ."
0,961 Disse wort begonde wegen
0,962 D' tuuellische degen
0,963 Gedenken gotis warheit
0,964 Daz die nie were geleit
0,965 Nider . da von er wol sprach
0,966 Als her dauid ovch v'iach
0,967 "Bedacht han ich ouch vil gar
0,968 Alde tage vn- iar
0,969 Gehabt in minen sinnen
0,970 Gedenkende da binnen
0,971 Ab got ewic zornic si
0,972 Odir tv den menschen vri
0,973 Sint er stetes si gerecht"
0,974 Im irschein ein sule slecht
0,975 Hoch gruesam oben guldin
0,976 Mitten erin iserin
0,977 Gemischet was sie vnden
0,978 Disser spiegel wart vunden
0,979 Zv siner einen gewalt
0,980 Gruelich vnd vngestat
0,981 Was sie vns vil manche zit
0,982 Vber alle die werlt wit
0,983 Betten en die lute an
0,984 Beide vrowen vn- man
0,985 Niemand man do so gut vant
0,986 Dem offen were daz lant
0,987 Daz vns von gote bereit
0,988 Dort was in der ewikeit
0,989 Dar vz er den tuuel stiez
0,990 Durch hochvart vnd vns daz liez
0,991 Wir waren ein spiegel clar
0,992 Nv ein glas nach aschen var
0,993 Werden wir in kurtzer vrist
0,994 In so vngetruwer list
0,995 Stunt die sele im benant
0,996 Als ich von d' schrift bekant
0,997 Habe . gantz vumf tusent iar
0,998 Zwei hund't iar ouch dar nar
0,999 An ein iar . do wart irweit

0,1000 Der stein den die sule neit
0,1001 Vnd sie vientlich nid' stiez
0,1002 Do er sich von berge liez
0,1003 Vnden an d' sule vuz
0,1004 Mariam ich nennen mvz
0,1005 Einen berg aller wunne
0,1006 Die ware gotis svnne
0,1007 Beschein sie wund'lichen
0,1008 Got bi ir was wonlichen
0,1009 Gantz war von eigener macht
0,1010 E ir die botschaft gebracht
0,1011 Wart von dem engel werden
0,1012 Vz gotis schoz zv r erden
0,1013 In den tempel . da sie lac
0,1014 Betende . sich d' beiac
0,1015 Wart ir nach deme gruze
0,1016 Got mensche d' vil suze
0,1017 Mit demvtigem lusmen
0,1018 Vnd ane zwiuels tusmen
0,1019 Sprach sie "ich bin gotis mait
0,1020 Mir gesche als dv gesait
0,1021 Hast nv mit dime mvnde"
0,1022 Sich in d' selben stunde
0,1023 Wal sich got in reines blut
0,1024 Vleisch vnd bein er an sich lut
0,1025 Einem menschen vollen glich
0,1026 Von d' edlen meide rich
0,1027 Doch gar ane mannes stam
0,1028 Cristus in ir h'ze qam
0,1029 Da von heizet sie vil wol
0,1030 Ein berc aller tugent vol
0,1031 Daud ir den namen gab
0,1032 Lange vor irem urhab
0,1033 Zv lobe . wand er so sprach
0,1034 In dem saltir vnde iach
0,1035 "Diz ist d' berc vollir lust
0,1036 Hier inne wonete sust
0,1037 Got war von gantzem willen
0,1038 Er wolde sich da stillen
0,1039 Vntz in daz ende d' zit
0,1040 Daz d' tuuellische nit
0,1041 Abe solde lazen vort"
0,1042 Paulus sprichet in daz wort
0,1043 "Wir sint . an die kvmen ist
0,1044 Ende d' werlde genist ."
0,1045 Also salt v daz v'stan
0,1046 Gotis zorn was gar v'gan
0,1047 Den er uf daz mensche truc

0,1048 Do sich d' stein vz irwuc
0,1049 Von disses berges slozze
0,1050 Die tuuelische kozze
0,1051 Wolde er gar v'terben
0,1052 Vnd im den menschen erben
0,1053 Dissen stein dauid kante
0,1054 Geistlichen er en nante
0,1055 Einez vullenvndis stein
0,1056 Creftic groz er im irschein
0,1057 Dar uf ovch petrus sprichet
0,1058 Mit lere er in brichet
0,1059 Aller cristenheit gemein
0,1060 Cristus ist der selbe stein
0,1061 Der von marien entsproz
0,1062 Ire kuscheit nie entsloz
0,1063 Sie bleib mait iuncvrov reine
0,1064 Tochter mvter sie eine
0,1065 Ist gotis . wand sie gab kleit
0,1066 Gote in warer menscheit
0,1067 Ane bruch vollen kvmen
0,1068 Dirre stein konde drvmen
0,1069 Vil gar des tuuels gewalt
0,1070 Nach disses steines zvhalt
0,1071 Wuchs er zv einem berge
0,1072 Irvullende an erge
0,1073 Vber al daz ertriche
0,1074 Ich meine creftecliche
0,1075 Sal vnser gelovbe sten
0,1076 Al die werlt alv-me gen
0,1077 Wand er starc gevestent ist
0,1078 Vf den stein gar ane list
0,1079 Svndir mit gotis warheit
0,1080 Petro wart so zv geseit
0,1081 "Dv bist ein stein ane zil
0,1082 Vf den ich nv buwen wil
0,1083 Gantz die mine cristenheit
0,1084 Dienstez sal sie mir gereit
0,1085 Wesen zv allen ziten"
0,1086 Man sprichet noch vil witen
0,1087 Heiden iuden vnbeart
0,1088 Doch so hat vns got gelart
0,1089 In dem ewangelio
0,1090 Sprichet er zv vns also
0,1091 "Etliche schaf han ich noch
0,1092 Vz mime schafhuse . doch
0,1093 Muz ich sie vuren hin in
0,1094 Daz ein schafhus mvge sin
0,1095 Vnd ein hirte d' ir sal

0,1096 Hutten lieplich vberal”
0,1097 Ez wirt noch ein gelovbe
0,1098 Iuden . heiden vil tovbe
0,1099 Werden alle gar bekart
0,1100 Zv dem gots gelovben zart
0,1101 Vor dem iungesten tage
0,1102 Glich nach d’ meistre sage
0,1103 Bi dissen ziten wil got
0,1104 Vns bereiten ane spot
0,1105 Ein riche vnv’genclich
0,1106 Vrevde zierheit ewiclich
0,1107 Sol wir han . da sundir wan
0,1108 Die im nach gevolget han
0,1109 Dort in dem himelriche
0,1110 Gesprochen wirt da “wiche
0,1111 Von mir dv armer sunder
0,1112 In daz tuuellische her
0,1113 Pine habe da mit not”
0,1114 Vns beware h’re got
0,1115 Mit d’ craft diner gotheit
0,1116 Sust ist die glos vz geleit
0,1117 Nv v’nemet hie gewis
0,1118 Aber eine bedutnis
0,1119 ICh vant noch an einer stat
0,1120 Waz die sule dutnis hat
0,1121 An danyelis meinen
0,1122 Do er mvste irscheinen
0,1123 Den trovm deme kvnge hoch
0,1124 War vf sich die sule zoch
0,1125 Daz sult ir hie horen nv
0,1126 Ez gehort wirdigen zv
0,1127 Ich mein werltlichen vursten
0,1128 Die sie hie lazen dursten
0,1129 Nach eren vnde landen
0,1130 Striten mit iren handen
0,1131 Vf daz sie vil ircriegen
0,1132 Lant landen vnd’biegen
0,1133 Vnd ouch daz sie vil schone
0,1134 Walden des riches crone
0,1135 Nabuchodonosor die
0,1136 Behielt mit striten alhie
0,1137 Manche zit vnde tage
0,1138 In danyelis sage
0,1139 Nante d’ sulen houbit
0,1140 Mit golde wol geloubit
0,1141 Sine gewalt dar nach wart
0,1142 Persen . meden . zv gekart
0,1143 Sie beduten vns vor war

0,1144 Brust vnd arme silbervar
0,1145 Von en ez in criechen qam
0,1146 Allexandro lobesam
0,1147 Creftic was er . sin gewalt
0,1148 Hert . vnd nach ere gestalt .
0,1149 Nv hat ez sich v'strichen
0,1150 Zv rome hin gewichen
0,1151 Ob allen landen gliche
0,1152 Nennet man romisch riche
0,1153 Iserin ist ez genant
0,1154 Betwingen sal ez die lant
0,1155 Als ysen tut allen hort
0,1156 Dar nach sal ez kvmen vort
0,1157 Dem himelischen gote
0,1158 Wand ez in des gebote
0,1159 Ist . vnde sal dr inne gen
0,1160 In d' dutschen hant besten
0,1161 Wie lange des vind ich nicht
0,1162 Scolastica die begicht
0,1163 Ich hoffe ez nicht wiche
0,1164 Got gebe vns sin riche
0,1165 Vernemet hie zv dute
0,1166 Alt vnde iunge lute
0,1167 Von einer sul was guldin
0,1168 Gemachet groz vnde fin
0,1169 Zv erenprise irkant
0,1170 Dem kvnge hie vor genant
0,1171 Dritte capitel diz ist
0,1172 Hilf vns h're ihv crist
0,1173 Nabuchodonosor nv
0,1174 Machen liez ein sule zv
0,1175 Guldin sechszic clafern hoch
0,1176 Sechs eln sich ir breite zoch
0,1177 Die satzte er in daz lant
0,1178 Babylonis so genant
0,1179 Vf ein velt hin zv duram
0,1180 Als d' sule wol gezam
0,1181 Iren eren zv lobe
0,1182 Gebieten er dar obe
0,1183 Liez vurstē . h'ren . knechten
0,1184 Voyten . schefferen schlechten
0,1185 Daz sie quemen alle her
0,1186 Zv dirre sul . nach d' ger
0,1187 Sinez h'zen . vnd me
0,1188 Sie solden alle in vle
0,1189 Begē vil wirdeclichen
0,1190 Ein hochzit vrvmelichen
0,1191 Der sulen rot von golde

0,1192 Bi kvniclicher holde
0,1193 Vil gar die vor besanten
0,1194 Alv-me so hin ranten
0,1195 Nach dem daz en betagit
0,1196 Was . ouch wart en gesaget
0,1197 Von des kvnges creieren
0,1198 Vberalle in den heren
0,1199 Die da stunden mit witzen
0,1200 Kein d' sule antlitzen
0,1201 Swen sie horten irschellen
0,1202 Bvsunen . pfifen gellen
0,1203 Pukn . harfen . lobelich
0,1204 So solden sie alle glich
0,1205 Nahen d' sule treten
0,1206 Mit wurden sie an beten
0,1207 Wer daz nicht tete zvhant
0,1208 Der solde werden v'brant
0,1209 In eime oven heizen
0,1210 Gluende von vueres beizen
0,1211 An dirre worte ende
0,1212 Wart ein schal vil behende
0,1213 Donende da vber al
0,1214 Secht do gienc ez an den val
0,1215 Niderwert zv d' erden
0,1216 Ieclich man was begerden
0,1217 Irvullen des kvnges wort
0,1218 E er wurde da irmort
0,1219 Odir lide keine not
0,1220 Also vluhen sie den tot .
0,1221 doch hatten sich irwege-
0,1222 Dri gar erliche degen
0,1223 Des todes wand sie wolden
0,1224 Nicht betten als sie solden
0,1225 Die sule an . sundir got
0,1226 Erten sie . vnd des gebot
0,1227 Von en wart gehalden da
0,1228 Besait wurden sie dar na
0,1229 Kein dem kvnge v-me daz
0,1230 Wie sie weren harte laz
0,1231 Sime gebote werde
0,1232 Wand sie nicht hie die erde
0,1233 Hetten gesucht mit venien
0,1234 Glich d' grozen menien
0,1235 Siner sule zv eren
0,1236 Ir gebete zv keren
0,1237 Vnde weren doch irkorn
0,1238 Der stat babylon bevorn
0,1239 Wesen von des kvnges hant

0,1240 Dar zv ouch die selben lant
0,1241 Weren en gar vnd'tan
0,1242 "Iuden sint die selben man"
0,1243 Sprachen vor war die heiden
0,1244 Dissen drin da zv leiden
0,1245 Die sie hatten besaget
0,1246 Nitlichen vnd geiaget
0,1247 Vf ir aller vnvrvmen
0,1248 Secht d' kvnic was kvmen
0,1249 Da von in vil grozen zorn
0,1250 Besante die wolgeborn
0,1251 Hiez sie kvmen vor sich sten
0,1252 Rischlich in sin ovgen gen
0,1253 Nabuchodonosor sprach
0,1254 Zv sydrach vnde mysach
0,1255 Vnd ouch zv abdenago
0,1256 Gar grimmeclichen also
0,1257 "ach wie sere ir snabit
0,1258 An min gote ir habit .
0,1259 Dekeinen gelouben z war
0,1260 Dar zv an die sule clar
0,1261 Von golde wol gemachet
0,1262 Vwer gemvte sachet
0,1263 Swen die busvnen schallen
0,1264 Daz uch danne ein vallen
0,1265 Bereit si zv d' erden
0,1266 Miner sulen vil werden
0,1267 Breitende ir lob wite
0,1268 Ouch in d' selben zite
0,1269 Betet sie an sundir wicht
0,1270 Tvt ir mins gebotis nicht
0,1271 Alzvphant muzet ir dort
0,1272 In des gluenden ovens bort
0,1273 Gestozen werden harte
0,1274 Wo ist die wid'parte
0,1275 Eines gotis ie bekant
0,1276 Der uch hie von miner hant
0,1277 Lose . vnd von miner macht"
0,1278 Mysach sydrach wol bedacht
0,1279 Sprachen vnd abdenago
0,1280 Also kein des kvnges dro
0,1281 "Wir muzen dich bescheiden
0,1282 O kvnic in den leiden
0,1283 Diner vrage vollenclich
0,1284 Got vnser h're gutlich
0,1285 Mac vns irlosen dem wir
0,1286 Getruwen . nach siner gir
0,1287 Von dinen handen vreyesen

0,1288 Vnd von des ovens reysen
0,1289 Tet er sin nicht zv d' stunt
0,1290 Kvnic . sich so si dir kvnt
0,1291 Daz wir doch nicht in noten
0,1292 Gelovben dinen goten
0,1293 Noch die sule beten an
0,1294 Daz wizze gar sund' wan"
0,1295 Do diz d' kvnic horte
0,1296 Er qam in zornis orte
0,1297 Brimmende er v'karte
0,1298 Alle varwe d' arte
0,1299 Kein dissin iungelingen
0,1300 Balde gebot er springen
0,1301 So hin den ouen gluen
0,1302 Siben stunt en me mven
0,1303 Dan / e / sin gewonheit was
0,1304 Vnd irhizen michels bas
0,1305 Dar zv hiez er den kinden
0,1306 Vuze vnd hende binden
0,1307 Mit starken stricken grozen
0,1308 Vnd in den ouen stozen
0,1309 Geleidet mit irn cleiden
0,1310 Zvhant die argen heiden
0,1311 Wurfen in den oven sie
0,1312 Gotis engel ouch alhie
0,1313 Mit en in den ouen qam
0,1314 Vnd warf vz des vueres vlam
0,1315 In grozer hitze walle
0,1316 Toete ez disse alle
0,1317 Ich meine des kunges man
0,1318 Die den kinden hie getan
0,1319 Hatten leide vnde not;
0,1320 Den wart dirre grimme tot
0,1321 Idoch sydrach mysach do
0,1322 Sazen . vnd abdenago
0,1323 Vrolichen in dem oven
0,1324 Begonden sie got loven
0,1325 Wirdeclichen ane we
0,1326 Reichten im die ire vle
0,1327 Abdenago d' stunt vf
0,1328 Gar an aller leye guf
0,1329 Prisende gotis guete
0,1330 Da in des ovens gluete
0,1331 Er sprach vil lieber here
0,1332 Got vnser vetre ere
0,1333 Gebenediet bist v
0,1334 Gelobet si al dar zv
0,1335 Din name ewiclichen

0,1336 Wand dv ie steteclichen
0,1337 Gerecht bist an diner tat
0,1338 Swie vns die begriffen hat
0,1339 Al dine werc sin bekant
0,1340 Vollenkvmen war genant
0,1341 Ist din gerichtete stete
0,1342 Waz dv vns h're tete
0,1343 Vnd irl'm d' stat
0,1344 Die vnser vetre an trat
0,1345 Von rechte tete dv daz
0,1346 An vns durch d' svnden haz
0,1347 Gesundet han wir kein dir
0,1348 Sere . nach des h'zen gir
0,1349 Vluhe wir dich h're got
0,1350 Widerzeme din gebot
0,1351 Was vns in vnsern oren
0,1352 Dur daz han wir v'loren
0,1353 Dich h're nv . wan dv vns
0,1354 Hast gegeben in vngvns
0,1355 Der vnschonenden heiden
0,1356 Ouch deme kvnge leiden
0,1357 Argen vnde vil snoden
0,1358 Aller tugende oden
0,1359 Nv si wir gar v'drucket
0,1360 In schemde hie gebucket
0,1361 Smaheit mvze wir liden
0,1362 Dine knechte vns miden
0,1363 Sam ein abtrunnige diet
0,1364 Svnden halb vns daz geschiet
0,1365 Herre got wir bitten dich
0,1366 Zvtz vns lieblich wid' sich
0,1367 Vnd la dinen zorn v'gan
0,1368 Daz wir icht sin vnd'tan
0,1369 Ewiclich d' heiden macht
0,1370 Hebe vns vz irme schacht
0,1371 Nicht zvch dine barmvnge
0,1372 Von vns in zornis sprvnge
0,1373 Svnd' gedenke d' / e /
0,1374 Die dv hattez mit vns / e /
0,1375 Gar liebende in zvpfflicht
0,1376 Zvstrovwe vns h're nicht
0,1377 Durch willen abrahamen
0,1378 Ysaac iacobis samen
0,1379 Gelobtez dv zv meren
0,1380 Groze vrucht an si kere-
0,1381 Glich sternem vnd dem grieze
0,1382 Des merez aller vlieze
0,1383 Doch si wir in disme zil

0,1384 Cleiner dan die heiden vil
0,1385 An geslechten durch torheit
0,1386 Niemand ist d' dir bereit
0,1387 Muge zu dienste gesin
0,1388 Bischof und vürsten mit in
0,1389 Ppheten opfer sangen
0,1390 Welcherleie man langen
0,1391 Welde diner wirdekeit
0,1392 Daz din zorn wurde geleit
0,1393 Werden kein uns in gedult
0,1394 Sund' die unse unschult
0,1395 Muz brengen demutikeit
0,1396 Sunde wesen darzu leit
0,1397 Ruwiges h'zen bestan
0,1398 Sust wilt u h're entpfan
0,1399 Uns zu genaden dinen
0,1400 Nach unsern grozen pinen
0,1401 Me danne durch keine vrucht
0,1402 Die man brechte diner zucht
0,1403 Opfernde in suzekeit .
0,1404 Entpfach h're nu bereit
0,1405 Unser andacht irlesen
0,1406 Laz sie den ougen wesen
0,1407 Behegelichen hute
0,1408 Wand allerleye lute
0,1409 Mugen sin ane gruwen
0,1410 Ane die dir getruwen
0,1411 Sich h're wir volgen dir
0,1412 Gar in unsers h'zen gir
0,1413 Suche wir din antlitze
0,1414 Gib h're uns die witze
0,1415 Hie losende von hitze
0,1416 In unsern h'ze- sitze
0,1417 Zu lobe dime namen
0,1418 Des wir noch nie irq\&lmen
0,1419 Geschant werden alle die
0,1420 Welche dine knechte hie
0,1421 Echten odir twingen hart
0,1422 Ire gewalt si v'kart
0,1423 Von dir vil lieb' h're
0,1424 Uf daz sie dir die ere
0,1425 Geben unde lazen vort
0,1426 Ewiclischen ane ort
0,1427 Dirre worte achten nicht
0,1428 Iene heiden noch geschicht
0,1429 Was en vor iren ougen
0,1430 Wie disse kint so tougen
0,1431 Sazen in des ovens glut

0,1432 Doch so warf dis selbe lut
0,1433 Hartz . pech . werc . kien . desten me
0,1434 Merende d' kindre we
0,1435 Da von sich d' vlamme zoch
0,1436 Nun und vierzic ellen hoch
0,1437 Uz dem oven vil heizen
0,1438 Er wart alu-me beizen
0,1439 Mit brunsten des kunges man
0,1440 Die er bi dem oven stan
0,1441 Vant vil gewaldeclichen
0,1442 Den muste hie entwichen
0,1443 Ir leben von vueres not
0,1444 Wen ez begreif d' was tot
0,1445 Aber disen kindelin
0,1446 Tet d' vlamme keine pin
0,1447 Gotis engel was mit in
0,1448 Kumen in den oven hin
0,1449 Vertreip den vlammen vil gar
0,1450 Under d' heidenen schar
0,1451 Machte den oven kule
0,1452 Glich halb in sulcher vule
0,1453 Als ein wint d' touwen let
0,1454 Und die erde hie bespret
0,7361 An d' irwelunge zol
0,7362 Luter nach d' wise wol
0,7363 Versucht in vueris beizen
0,7364 Die sund' sich ouch reizen
0,7365 Sere zu d' ubeltat
0,7366 Unv'nemelichen grat
0,7367 Haben sie algemeine
0,7368 Zwo zit verwischen reine
0,7369 Swenne daz opfir blichet
0,7370 Zierheit mit im entwichet
0,7371 Gar eyzam diz wusten wirt
0,7372 Tusent tage liecht v'schirt
0,7373 Zwei hund't unde nunzic
0,7374 Geboren ist er selic
0,7375 Swer beitende bekumet
0,7376 Biz sich die zal v'drumet
0,7377 Alhie mit tusent tagen
0,7378 Dar uf dri hund't iagen
0,7379 Ouch vumf und drizic en zu
0,7380 Danyel mache dich nu
0,7381 Hin wid' an din gemach
0,7382 Gelucke daz sal gevach
0,7383 Walden d' tage ende
0,7384 Hie diz capitel wende
0,7385 Ja stet die sine glose

0,7386 Bluende sam ein rose
0,7387 In apocalipsi blic
0,7388 Zwenzic des capitels ric
0,7389 Beheldet sie in warheit
0,7390 Maria die reine meit
0,7391 Helfe uns allen gliche
0,7392 Vrolich in gotis riche
0,7393 Swen uns daz leben entgat
0,7394 Disse rede hie bestat
0,7395 Nu ist danyel geant
0,7396 Als man en beschriben vant
0,7397 Hebreyscher zungen wort
0,7398 Waz vur baz me wirt gehort
0,7399 Untz an diz buches ende
0,7400 Daz ist uns vil behende
0,7401 Worden von rede gewis
0,7402 Hern theodocionis
0,7403 Da von blibe er hie stan
0,7404 Zu susannen wil ich gan
0,7405 Und uch sayn wi ez geschach
0,7406 Do man sie velschlich besp\&2ch
0,7407 Drizend capitel diz ist
0,7408 Hilf lieber h're ihesu crist
0,7409 E z was in babylone
0,7410 Ein man an wurden schone
0,7411 Genant was er ioachim
0,7412 Zu wibe hie nam er im
0,7413 Susannam elchye vrucht
0,7414 Schonen lib truc sie in zucht
0,7415 Da bi die gotis vorchte
0,7416 Des vatirs lere worchte
0,7417 Und d' muter die an ir
0,7418 Ziende sie in h'zen gir
0,7419 Nach d' e moysi
0,7420 Gerecht waren sie alhi
0,7421 Beide an allen sachen
0,7422 Richtum wart bedachen
0,7423 Ioachym vil mechticlich
0,7424 Na bi im stunt lobelich
0,7425 Gepropfet ein boumgarte
0,7426 Zutz im q\&1m manche parte
0,7427 Der iuden durch hubischeit
0,7428 Wirde was er an geleit
0,7429 Vil me danne dekein man
0,7430 In dem iare sach man han
0,7431 Gerichte zwene alden
0,7432 Got sp\&2ch von irme walden
0,7433 Vormalis als ez geschach

0,7434 Uz babylone gevach
0,7435 Ist gesprozen die bosheit
0,7436 Von den eldesten geleit
0,7437 Dem volke zu richteren
0,7438 Disse zwene geweren
0,7439 Quamen zu ioachyms hus
0,7440 Recht gaben sie aldar us
0,7441 Durch daz wurden sie gesucht
0,7442 Steteclichin und berucht
0,7443 Daz volc daz gerichtis pflac
0,7444 Alle zit uf mitten tac
0,7445 Swenne d' lute scharen
0,7446 Heimwert gewandert waren
0,7447 So gienc susanna warten
0,7448 Hin in den boumgarten
0,7449 Ires wirtes uf wunnen
0,7450 Die richter unv'sunnen
0,7451 Sahen sie tegelichen
0,7452 Dort in dem garten strichen
0,7453 Da von quamen sie in lust
0,7454 Vleischlicher liebe akust
0,7455 Trugen sie kein d' reinen
0,7456 Ir sinne wart sich leinen
0,7457 Niderwert und ir ougen
0,7458 Uf den ertbodim bougen
0,7459 Senende durch disse dinc
0,7460 Miden sie des himels rinc
0,7461 Mit ougen sehen rechten
0,7462 Uf daz sie icht gedechten
0,7463 An gerichtes rechtikeit
0,7464 Der liebe swert sere sneit
0,7465 Alhie die alden beide
0,7466 En brachte liebe leide
0,7467 Itweder in dem h'zen
0,7468 Leit bitterlichen smertzen
0,7469 Dekeinen torste entwene
0,7470 Dem andren hie sin senen
0,7471 Vor schemden sulches willen
0,7472 Wand ieclicher in stillen
0,7473 Gedachte gantz volbringen
0,7474 Al sines herzen ringen
0,7475 Listlich an d' vil guten
0,7476 Sie was in iren hutten
0,7477 Tegelich uf ein spehen
0,7478 Ob sie wurde gesehen
0,7479 Irgent heimelichen stan
0,7480 Einer sprach den andern an
0,7481 Ge wir heim ez ist nu zit

0,7482 Ezzens . secht da gienc besit
0,7483 Ieclicher sich zu tucken
0,7484 Gesamnet da in rucken
0,7485 Wurden sie an eine stat
0,7486 Vrage zwischen en do trat
0,7487 Waz ie d' man da schufe
0,7488 Bekant ane gerufe
0,7489 Wart under en die sache-
0,7490 Entzwischen sie do machen
0,7491 Begunden die einunge
0,7492 Swie disse vrowe iunge
0,7493 Queme en zu bestricken
0,7494 Sust wurden sie sich schicken
0,7495 Eigenlich zu den sunden
0,7496 Daz sie sie eine vunden
0,7497 Die wile daz sie warten
0,7498 D' reinen suzen zarten
0,7499 Pruvende hie tegelich
0,7500 Um ein zit bequemelich
0,7501 Do geschach daz sie gemeit
0,7502 Gienc nach irre gewonheit
0,7503 Dort in des gartin ouwen
0,7504 Eine mit zwen iuncvrouwen
0,7505 Gar ane valsche sinne
0,7506 Uf daz sie sich dar inne
0,7507 Irwusche wand ez was heiz
0,7508 Den somer . da von sich vleiz
0,7509 Badins daz vil reine wib
0,7510 Sulcher zit den iren lib
0,7511 Allez uber einen tac
0,7512 Odir wen d' dritte lac
0,7513 Heimelich stunt d' sitte
0,7514 Niemand was en da mitte
0,7515 Sundir die zwene alden
0,7516 Listlich vor en behalden
0,7517 Schowende die vil reiden
0,7518 Sie sp\&2ch zu iren meiden
0,7519 Holet mir die salbe nu
0,7520 Und daz ol . ouch sliezet zu
0,7521 Des boumgarten gahe
0,7522 Biz daz ich mich getwahe
0,7523 Idoch in dirre geschicht
0,7524 Weste sie d' alden nicht
0,7525 Alda bi ir v'holen
0,7526 Do sie die dinc bevolen
0,7527 Hatte sust durch ir gemach
0,7528 Diz geheiz vil gar geschach
0,7529 Rischlich von iren dirnen

0,7530 Geslozzen wart mit virnen
0,7531 Daz tor mit sime rigle
0,7532 Heimwert durch eine stigle
0,7533 Sprungen die meide gevach
0,7534 Bringen swaz ir vrowe sp\&2ch
0,7535 Da bevor . nach en zu hant
0,7536 Wurden die alden gewant
0,7537 Greslich an disse reine
0,7538 Sprechende wir sint eine
0,7539 Itzunt hie bi ein ander
0,7540 Ouch des garten inwand'
0,7541 Ist v'rigelt vil harte
0,7542 Unser mac nieman warte
0,7543 Genemen mit v'dieben
0,7544 Wir sint vleischlicher lieben
0,7545 Entprant in diner gere
0,7546 Dar umme uns gewere
0,7547 Dines libes sundir haz
0,7548 Wirdest u kein uns des laz
0,7549 So wizze daz wir uf dich
0,7550 Zugen beide sulch begich
0,7551 Wie zu dir ein iungelinc
0,7552 Were uf unkusche dinc
0,7553 Kumen . da von hettes du
0,7554 Gelazen die juncvrowe- nu
0,7555 Von dir in dirre stunde
0,7556 Susanna die begunde
0,7557 Sufzen . da bi sus sprechen
0,7558 Sorge itzunt mich brechen
0,7559 Hin unde her mit quele
0,7560 Ich enweiz waz ich wele
0,7561 Tu ich diz daz ist min tot
0,7562 Lazende wirt mir hie not
0,7563 Entstun von uwer gewalt
0,7564 Bezzer ist daz ich gezalt
0,7565 Werde in menschlichen pranc
0,7566 Ane tat . wen daz ich cranc
0,7567 Stunde vor gotis blicken
0,7568 Von disser sunde ricken
0,7569 Vol endene dar nach vloz
0,7570 Uf hulfe ein stimme groz
0,7571 Hie uz susannen munde
0,7572 Glich ir mitte begunde
0,7573 Donen d' alden bleken
0,7574 Kein ir . doch wart sich neken
0,7575 Der pforten die vil gute
0,7576 Creftlich des rigels hute
0,7577 Brach sie an deme garten

0,7578 Ir knechte liefen warten
0,7579 Uz d' tur ires huses
0,7580 Waz jemerliches suses
0,7581 Sich irhube en so na
0,7582 Die alden begunde- da
0,7583 Sagen smeheliche tat
0,7584 Alzu hant sie al an trat
0,7585 Leide . durch die rede hie
0,7586 Wand man da vor hatte nie
0,7587 Vernumen von susannen
0,7588 Eins sulchen lastirs wannen
0,7589 Tragen in lobis wage
0,7590 An deme andren tage
0,7591 Do daz volc gesamnet was
0,7592 In ires wirtes palas
0,7593 Joachims do quamen gen
0,7594 Jene . die so hie v'sten
0,7595 Solden mit gerechtikeit
0,7596 Vol was ir sinne bosheit
0,7597 Wie sie susannen echten
0,7598 Mit rede . unde brechten
0,7599 Den tot kein irme leben
0,7600 Dem volke wart gegeben
0,7601 Gebot von en sulcher wort
0,7602 Sendit zu susannen dort
0,7603 Helchye tochter benant
0,7604 Husvrou ioachyms irkant
0,7605 Daz sie kume vor uns her
0,7606 Balde wurden dise mer
0,7607 Gebracht an daz reine wib
0,7608 Sie gestalte iren lib
0,7609 Vor die richtere eben
0,7610 Ez waren ir beneben
0,7611 Vater muter ire kint
0,7612 Omen . mage . swaz d' sint
0,7613 Clagende in den stunden
0,7614 En mitte ouch die kunden
0,7615 Sach man ir zere giezen
0,7616 Vil ougen wazzer liezen
0,7617 Um susannen ungemach
0,7618 Behullet in wimpils vach
0,7619 Waren d' zarten blicke
0,7620 Durch daz . daz iemant stricke
0,7621 Gewunne von irme bren
0,7622 Nietlich was sie an zu sen
0,7623 Schone in rechter varwe
0,7624 Man horte ir zu harwe
0,7625 Sprechen die valschen alden

0,7626 Nemet des sloyers valden
0,7627 Hin wec lat sie bloz bestan
0,7628 Sufzen weinen hub sich an
0,7629 Starc vloz d' trene vlute
0,7630 Doch was ir daz gemute
0,7631 Geringet in gotis trost
0,7632 Als sie wurde noch irlost
0,7633 B i d' wile stunden uf
0,7634 Die zwene richter in guf
0,7635 Undir des volkes scharen
0,7636 Und leiten zu volvaren
0,7637 Ir beider hende schirbel
0,7638 Hin uf susannen wirbel
0,7639 Sprechende bede alsust
0,7640 Wir giengen eine durch lust
0,7641 In disses garten owen
0,7642 Do q\&1m mit zwen iuncvrowen
0,7643 Disse vrowe ouch dar in
0,7644 Von en wart daz pfortelin
0,7645 Geslozzen in den ziten
0,7646 Sie sante von ir siten
0,7647 Beide meide dar nach q\&1m
0,7648 Zutz ir ein iunc mannis nam
0,7649 Des wir vor e nicht ensan
0,7650 Libes lust wurden sie han
0,7651 Unkuschlich mit einandir
0,7652 Unsers gesichtes wandir
0,7653 Mercte vil wol die bosheit
0,7654 Uz d' lagen en geleit
0,7655 Dort in des garten winkel
0,7656 Streckende unser schinkel
0,7657 Begunde wir uns rischen
0,7658 En kegen uf irwischen
0,7659 Mit ein andir an d' tat
0,7660 Der iungelinc sinen pfat
0,7661 Schicte uns zu entpflihen
0,7662 Er wart sich sere zihen
0,7663 So hin zu des garten tur
0,7664 Drate wischte er hin vur
0,7665 Wand er unser sterker was
0,7666 Loufens wurde wir vil las
0,7667 Da von mochte wir sin nicht
0,7668 Begrifen . nach d' geschicht
0,7669 Vienge wir diz vrowelin
0,7670 Manende daz sie uns sichin
0,7671 Machte wer d' iunge man
0,7672 Were . d' uns da entran
0,7673 Nicht wolde sie en melden

0,7674 D' dinge die hie zelden
0,7675 Si wir gezuge vorwar
0,7676 Daz volc en geloubte gar
0,7677 Dirre geschichte wisen
0,7678 Swen sie waren ir grisen
0,7679 Pflieger gerichtes da bi
0,7680 Ein urteil lief von en vri
0,7681 Uber susannen leben
0,7682 Rufen wart sie en eben
0,7683 Grozer stimme in d' not
0,7684 O h're ewiger got
0,7685 Dem da nicht v'borgen ist
0,7686 Bekennende du hie bist
0,7687 Eygenlichen alle dinc
0,7688 E dan en wirt ursprinc
0,7689 Gegeben mit entzaben
0,7690 Du weizt wol da sie haben
0,7691 Gezuget velschlich
0,7692 Lieber h're da von sich
0,7693 Wie min lib nu wirt irmort
0,7694 Wen ich nie d' dinge dort
0,7695 Begienc die sie han geseit
0,7696 Uf mich und uz geleit
0,7697 Boslich in irme grimme
0,7698 Got horte disse stimme
0,7699 Vrontlich wand sie en rurte
0,7700 Als man susannen vurte
0,7701 Zu toeten an dem wege
0,7702 Irquicte gotis pflege
0,7703 Eines iungen kindes geist
0,7704 Danyel was im geleit
0,7705 Sin name en zu nennen
0,7706 An im wart man irkennen
0,7707 Luten ruf mit den Worten
0,7708 Ich bin an allen orten
0,7709 Unschuldic ires blutes
0,7710 Daz volc vil gahes mutes
0,7711 Trat hin zu dem kinde na
0,7712 Sage uns sp\&2chen sie da
0,7713 Waz rede hast u getan
0,7714 Ez stunt mitten und began
0,7715 Antworten ane helen
0,7716 So tu-men israhelen
0,7717 Richtet hie sundir sinne
0,7718 Nicht merkende da binne
0,7719 Ob die rede in warheit
0,7720 Beste die da wirt gebreit
0,7721 Clagende war benumet

0,7722 Sust habit ir v'tumet
0,7723 Urteilende die tochter
0,7724 Israhelischer lochter
0,7725 An hengende in slichte
0,7726 Get wid' zu gerichte
0,7727 Valschen gezuc haben sie
0,7728 Getan uf die vrowe hie
0,7729 Swechende ire wurde
0,7730 Allez volc in begirde
0,7731 Karte wid' alzuhant
0,7732 Kosen man die alden vant
0,7733 Keyn danyelis wisheit
0,7734 Kum mitte sitze gemeit
0,7735 Zwischen uns unde gib recht
0,7736 Dir hat got v'ligen slecht
0,7737 Alhie des ald'es ere
0,7738 Daz kint sp\&2ch ane lere
0,7739 Teilet sie an zwo siten
0,7740 Nicht nahe sundir witen
0,7741 Secht so mac man und' in
0,7742 Vinden . des ich richter bin
0,7743 Horende eine stunden
0,7744 So wirt die warheit vunden
0,7745 Nach dirre zweier scheiden
0,7746 Wart danyel d' leiden
0,7747 Einen rufen unde sp\&2ch
0,7748 Snodis . aldir . da bi swach
0,7749 Des lebens diner tage
0,7750 Hie ist d' sunden vlage
0,7751 Kumen die du hast da vor
0,7752 Getan . in gewaldis spor
0,7753 Richtende unzimelich
0,7754 Verdrucket ist hie durch dich
0,7755 Der reine zu aller zit
0,7756 Loufen lisest du besit
0,7757 Den bosen mit gebrechte
0,7758 Swie got doch sp\&2ch vil schlechte
0,7759 Nicht toete den gerechten
0,7760 Die guten las nicht schechten
0,7761 Keiner wis . nu sage an
0,7762 Under welches boumes plan
0,7763 Sp\&2chen sie en entzwischen
0,7764 Er sp\&2ch ich sach sie mischen
0,7765 Rede bi d' criecken boum
0,7766 Niden uf d' erden soum
0,7767 Wart ir gelubde vol ant
0,7768 Do sp\&2ch danyel zuhant
0,7769 Unwar hast u nu gesait

0,7770 In din houbt . da von dich iait
0,7771 Gotis engel wand d' hat
0,7772 Genumen von im den rat
0,7773 Urteilende din leben
0,7774 Dich wil er howen eben
0,7775 Von ein ander . ewec gienc der
0,7776 Man rufte do ieme her
0,7777 Zu deme sp\&2ch d' iunge
0,7778 O chanaanis zunge
0,7779 Geborn . und nicht von iuda
0,7780 Fine schone hat dich da
0,7781 Betrogen ouch die gere
0,7782 Verkarte vil gewere
0,7783 Din h'ze mit dem willen
0,7784 Sust tatet ir in stillen
0,7785 Gewalt den tochteren vorwar
0,7786 Uz d' israhelen schar
0,7787 Swen die horten uwer wort
0,7788 Vor vorchten wart ez gehort
0,7789 Bejehende uch da mitte
0,7790 Dirre suntliche sitte
0,7791 Was iude tochter wider
0,7792 Sie enwolde nicht nider
0,7793 Legen die gotis vorchte
0,7794 Da von sie nicht enhorchte
0,7795 Uwer mutende- bosheit
0,7796 Nu bekenne in warheit
0,7797 Wie hiez d' boum da dir wart
0,7798 Schinber dirre zweier vart
0,7799 Kosende durch snode lust
0,7800 Hin wid' sp\&2ch er alsust
0,7801 Ein sle dorn schuf en gemach
0,7802 Danyel do abir sp\&2ch
0,7803 Disse rede die nu louft
0,7804 Ist ouch unwar in din houft
0,7805 Kumen uz dinem munde
0,7806 Hie stet in dirre stunde
0,7807 Kein dir gotis engel clar
0,7808 Habende ein swert vil bar
0,7809 Uf daz er dich sla entzwei
0,7810 Uch toetende zuhant schrei
0,7811 Allez volc . in stimme groz
0,7812 Lobende den got d' loz
0,7813 Machet die im getruwen
0,7814 Glich wurden sie sich gruwen
0,7815 Jenen zwehen richteren
0,7816 Rechtes kein en begeren
0,7817 Wand danyel sie vunden

0,7818 Hatte . ouch ub'wunden
0,7819 Uz irem munde geseit
0,7820 Valschen gezuc und geleit
0,7821 An irem eben cristen
0,7822 Man tet en sund' vriste-
0,7823 Als sie hatten hie getan
0,7824 Boslich des muste irgan
0,7825 Uber sie ein gerichte
0,7826 Als ez die ehe tichte
0,7827 Moysi d' sie gebot
0,7828 Bede liden sie den tot
0,7829 Mit bitterlicher vlage
0,7830 Irlost wart an dem tage
0,7831 Unschuldic blut . ouch ein lib
0,7832 Helchyas unde sin wib
0,7833 Sp\&2chen gote irgebet
0,7834 Umme daz er hulfe tet
0,7835 Susannen irme kinde
0,7836 Joachym ir wirt linde
0,7837 En mitte dancte sere
0,7838 Wunne pris lob und ere
0,7839 Saiten im ouch ir vrunde
0,7840 Daz sie d' bosen sunde
0,7841 Mut noch willen nie gewan
0,7842 Danyelen wart man han
0,7843 Grozer wurde vur baz me
0,7844 Bi d' zit viel ouch in we
0,7845 Astiages d' kunic
0,7846 Sterbende nam er hie nic
0,7847 Menschlich an sime leben
0,7848 Begraben wart er eben .
0,7849 zu sinen vetren alda
0,7850 Cyrus d' entpfienc darna
0,7851 Gewaldeclich die crone
0,7852 Persen lant im ouch schone
0,7853 Was und'tan ub' al .
0,7854 zu im in des riches sal
0,7855 Nam er mit uzirwelen .
0,7856 den wisen danyelen
0,7857 Durch die vorbesichtikeit
0,7858 Im wart da von hie bereit
0,7859 Ere mancherhande wis
0,7860 Vor des kunges vrunt er pris
0,7861 Behielt in des riches hus
0,7862 Diz capitel ist nu us
0,7863 Vierzend capitel diz ist
0,7864 Gnade he'e Jhesu crist
0,7865 Ein abgot was ouch irkant

0,7866 In d' babylonen lant .
0,7867 bel hiez er irre wise
0,7868 Dem gab man ie zu spise
0,7869 Tegelich zwelf wize brot
0,7870 Vierzic schaf den win so rot
0,7871 Sechs kannen was die maze
0,7872 Bi dirre pfrunde saze .
0,7873 geloubete hie an in
0,7874 D' kunic . des was sin sin
0,7875 Uf en v'vlizzen sere .
0,7876 irbitende im ere
0,7877 Richlichen alle tage .
0,7878 mit des gebetes wage
0,7879 Daz er im zu wurden tet
0,7880 Danyel hielt sin gebet
0,7881 Gote sime h'ren ho
0,7882 Zutz im s\&2ch d' kunic so
0,7883 Durch waz lobest u nicht bel
0,7884 Im antworte danyel
0,7885 Gelouben ich nicht wende
0,7886 Kein goten die hie hende
0,7887 Machen . sundir in den got
0,7888 Des leben an allen spot
0,7889 Ewic ist und selbe hat
0,7890 Gemachet des himels grat
0,7891 Erden bodim ouch dar zu
0,7892 Er weldet in siner ru .
0,7893 aller c'aturen sig
0,7894 Hin widir s\&2ch d' kunig
0,7895 Dunket dich nicht daz bel si
0,7896 Lebende ein got vri .
0,7897 od' siest u nicht wi vil
0,7898 Sin munt aller tage zil
0,7899 Izzet trinket hie gevach
0,7900 Lachende hin wid' s\&2ch
0,7901 Do danyel gar vruntlich
0,7902 O kunic nicht irre dich
0,7903 Dirre abgot ist vorwar .
0,7904 binnen hor uzwendic clar
0,7905 Erin . un- izzet nicht
0,7906 Alzu hant durch die geschicht
0,7907 Wart d' kunic zornis vol
0,7908 Rufen hiez er rechter dol
0,7909 Den pflegern des abgotis
0,7910 Sprechende zutz en drotis
0,7911 Ir en saget mir gliche
0,7912 Swer disse spise riche
0,7913 Ezze . secht so sterbet ir

0,7914 Abir wirt von uch hie mir
0,7915 Bewiset daz sich vute .
0,7916 da mitte bel so wute
0,7917 Ich danyelen leben .
0,7918 getotit wirt er eben
0,7919 Umme daz wan er en hat
0,7920 Beret . danyel sust bat
0,7921 Kunic alle dine wort .
0,7922 sullen gen daran vort
0,7923 Ub' uns uf irvare- .
0,7924 secht belis pfleg' ware-
0,7925 Sibenzic und ire wib
0,7926 Sundir kind' die ir lib
0,7927 Zilende gab ane zal
0,7928 Dar nach q\&l in belis sal
0,7929 Zierlich der kunic werde
0,7930 Ouch danyel in gerde
0,7931 Gienc mit im von h'zen vro
0,7932 Belis priestre s\&2chen do
0,7933 Nu sich kunic wir gen us
0,7934 Setze spise in diz hus
0,7935 Win da bi sluz zu die tur
0,7936 Lege din peschot da vur
0,7937 Unde kum morgen wid'
0,7938 Vindest u die kost sider
0,7939 Von belin nicht uf gezzen
0,7940 So welle wir v'mezzen
0,7941 Liden schemelichen tot
0,7942 alhi od' disse not
0,7943 Muz danyel voltragen
0,7944 Wand er mit lugen sagen
0,7945 Uf uns g'ne brechte haz
0,7946 Bi d' wile wart ie baz
0,7947 Prueven danyel die hol
0,7948 Under deme tische wol
0,7949 Die sie hatten gemachet
0,7950 Vil heimelich bedachet
0,7951 En zu gehen uz und in
0,7952 Verzernde brot vleisch den win
0,7953 Swen ez vor den abgot q\&l
0,7954 Sulcher wis man ez im nam
0,7955 Nach dirre pfleger uz gen
0,7956 Und d' kunic beln sin len
0,7957 Selber hatte vor geleit
0,7958 Do gebot in sicherheit
0,7959 Danyel sinen knechten
0,7960 Daz sie im asche brechten
0,7961 Rischlich unde strouten die

0,7962 Unden in den tempel hie
0,7963 Vor dem kunge uber al
0,7964 Dar nach rumten sie den sal
0,7965 Zu sliezende vil harte
0,7966 durch des ingangis warte
0,7967 Sluc d' kunic vor daz toz
0,7968 Sin wachszeichen . secht dar noz
0,7969 Des selben nachtis q\&1men
0,7970 Die pfleger allentsamen
0,7971 Wib kind' en da mitte .
0,7972 als sie ir vord' sitte
0,7973 Larte . und v'zerten gar
0,7974 Swaz d' kunic hatte dar
0,7975 Dem abgote gegeben .
0,7976 vil vru des morge-s neben
0,7977 Gienc dem kunge danyel
0,7978 So hin zu des tempels hel
0,7979 Wartende kein im do s\&2ch
0,7980 D' kunic ist nu kein schwach
0,7981 Wurden an disme zeichen
0,7982 Im wart danyel reichen
0,7983 Sine wort neyn sp\&2ch er
0,7984 Uf sloz d' kunic in ger
0,7985 Sehende uf den altar
0,7986 Luter stimme schrei er zwar
0,7987 Groz stet bel in wirdekeit
0,7988 Bi im ist keine valscheit
0,7989 Bevunden in den sachen
0,7990 Ez wart danyel lachen
0,7991 Sere doch er umme vienc
0,7992 Den kunic daz er nicht gienc
0,7993 In den tempel uf ein spen
0,7994 Er s\&2ch h're du salt sen
0,7995 Pruelichen swes die pfat
0,7996 Mugen sin die vor dir stat
0,7997 Gebrechet uf dem tenne .
0,7998 ich se . un- bekenne
0,7999 Sp\&2ch d' kunic vollen ant
0,8000 Vuzstappen sin mir irkant
0,8001 Manne wibe cleiner kint
0,8002 Zornic wart er . da bi vint
0,8003 Dirre priestre . und gebot
0,8004 Sie im bringen durch die not
0,8005 Machten sie im offenbar
0,8006 Sulche hol da ire schar
0,8007 Heimelich gienc in daz hus
0,8008 Verzerende gar dar us
0,8009 Waz uf den tisch wart gesant

0,8010 Toeten hiez do alzuhant
0,8011 Disse priestre d' kunic
0,8012 Wib kint mit en in amblic
0,8013 Lagen vil gar irslagen
0,8014 Gewalt nach disen vlagen
0,8015 Gab er danyle vort .
0,8016 ub' bel . do daz irhort
0,8017 Hatte d' vil reine man
0,8018 Beln zu brechen er began
0,8019 Ouch sinen tempel soren
0,8020 Umwerfende zustoren
0,8021 E z was in d' selben zit
0,8022 Ein groz trache da besit
0,8023 In d' stat zu babylon
0,8024 Geloubende was gewon
0,8025 An en d' in woner sin
0,8026 Zutz im wolde zihen hin
0,8027 Der kunic danyelen
0,8028 Er s&2ch nu ist kein velen
0,8029 Alhie mit abe brechen
0,8030 Du en mugest wol sprechen
0,8031 Diz si ein lebender got
0,8032 Bete en an . im do bot
0,8033 danyel die rede sin
0,8034 Ich diene dem h'ren min
0,8035 Wand d' ist got unde hat
0,8036 Ewic leben . disme stat
0,8037 Todis ende uf gezalt
0,8038 Gib du mir kunic gewalt
0,8039 Daz ich den trachen toete
0,8040 Im wirt des todes noete
0,8041 Von mir ane swert getan
0,8042 Dekein wafen sal en slan
0,8043 Geloube mir secht zuhant
0,8044 Sp&2ch d' kunic diner hant
0,8045 Verlie ich den trachen .
0,8046 do wart danyel sachen
0,8047 Zu samne pech . smaltz die har
0,8048 Sieden liez er disse par
0,8049 Unde machte uz d' grus
0,8050 Stucke dar nach er die mus
0,8051 Leite in des trachen munt
0,8052 Dirre valant in d' stunt
0,8053 Irstarb brestende vil gar
0,8054 Do s&2ch danyel nu dar
0,8055 Wen habet ir geeret
0,8056 Sin toeten unverseret
0,8057 Die babylonen muete

0,8058 Leidic in zornis gluete
0,8059 Samenten sie sich drate
0,8060 Uf den kunic . zu rate
0,8061 Gienge- sie almittalle .
0,8062 in eime grozen schalle
0,8063 Riefen sie d' kunic ist
0,8064 Under uns in kurtzer vrist
0,8065 Worden ein iude vorwar
0,8066 Beln den liez er offenbar
0,8067 Storen . dar nach in noeten
0,8068 Hiez er die priestre toeten
0,8069 Nu ist d' trache irmort .
0,8070 reden sie gienge- vort
0,8071 Truchtlich vor den kunic stan
0,8072 Schriende gib uns den man
0,8073 Vil balde d' beln nu hat
0,8074 Zu brochen . und da bi stat
0,8075 Schuldic an des trachen strich
0,8076 Odir wir irtoeten dich
0,8077 Mit samt dime gesinde
0,8078 Als disse drowe swinde
0,8079 Horte d' kunic w'de
0,8080 kein im mit ungeberde
0,8081 Wesen durch getwanges sin
0,8082 Gab er danyelen hin
0,8083 Irme willen und'tan .
0,8084 nid' wurde- sie en lan
0,8085 Unden in d' lewen gruft
0,8086 Drinne was er irre guft
0,8087 Sechs tage bi den lewen
0,8088 Ir waren siben even
0,8089 Tegelichen man en gab
0,8090 Zwene corpir und zwei schab
0,8091 Spisende sie da mitte
0,8092 Gebrechen wart d' sitte
0,8093 Disse tage vor genant
0,8094 Keine kost wart en gesant
0,8095 Durch daz danyel von in
0,8096 Vrezzen wurde . zu gewin
0,8097 Was ein pphete irkant
0,8098 Aldort in judee lant
0,8099 Abacuc was sin name
0,8100 Dirre vil lobesame
0,8101 Hatte ein musel bereit
0,8102 Dar zu rerinde geleit
0,8103 Brot in ein eschil . gezelt
0,8104 Q\%1m er so hin uf daz velt
0,8105 Tragende des libes nar

0,8106 Sinen medern . im wart bar
0,8107 Gotis engel . d' sust s\&2ch
0,8108 Brengē diz ezzen gevach
0,8109 Zu babylon dirre vrist
0,8110 Danyelen d' da ist
0,8111 Gesant in d' lewin zuc
0,8112 Im antworte abacuc
0,8113 H're ich gesach noch nie
0,8114 Babylon und ouch da bie
0,8115 Weiz ich nicht d' tiere hol
0,8116 En begreif d' engel wol
0,8117 Obne bi sime hare
0,8118 Vurende en dar nare .
0,8119 so hin zu babylone
0,8120 Rischlich . darzu vil schone
0,8121 Satzte er en uf den schacht
0,8122 Sines geistes louf bedacht
0,8123 Schrei abacuc von d' want
0,8124 Entpfach diz ezzen gesant
0,8125 Dir danyel von gote
0,8126 Du bist sin rechter bote
0,8127 Dienstlichen ane wanc
0,8128 Lute danyel do sanc
0,8129 H're got du hast min ruch
0,8130 Gedenkende zu gesuch
0,8131 Bist u aller d' die dich
0,8132 Lieben . dar nach irhub sich
0,8133 Vrolich danyel und az
0,8134 Gewidert gar sundir laz
0,8135 Wart abacuc an sin stat
0,8136 Von gotis engel . ez trat
0,8137 An dem sibende- tage .
0,8138 uf danyelis clage
0,8139 Neben die gruft der kunic
0,8140 Werfende hin sinen blic
0,8141 Nach im do wart er im kunt
0,8142 Sitzende vil wol gesunt
0,8143 Zwischen den lewen aldort
0,8144 Grozer stimme s\&2ch er vort
0,8145 Mechtic bist u sundir spot
0,8146 H're danyelis got
0,8147 Ewiglich . hie nach er liez
0,8148 En uz nemen . unde hiez
0,8149 Jene werfen in den grunt
0,8150 Die er weste ein urvunt
0,8151 Wesen danyelis not
0,8152 Endelich q\&1m en d' tot
0,8153 Rizende von den lewen

0,8154 Vor deme kunge even
0,8155 Sturben alle disse man
0,8156 Sulche wort hub er do an
0,8157 Kosende uf disse dinc
0,8158 Alle die d' werlde rinc
0,8159 Hat begriffen in zu kumft
0,8160 Sullen vorchten in v'numft
0,8161 Danyelis got vorwar
0,8162 Er ist d' da offenbar
0,8163 Mac heilen und irlosen
0,8164 Betrubnis kan er osen
0,8165 Wund' wirken mechteclich
0,8166 Erden bodim himelrich
0,8167 Stet im des zu gebote
0,8168 Wand er hat uz dem mote
0,8169 Gerucket d' vil vreisen
0,8170 Lewen die drinne reisen
0,8171 Den guten Danyelen
0,8172 Sich wil ouch abeschelen
0,8173 Nu des capitels ende
0,8174 Hie sine rede wende
0,8175 Vernemt mit uzlegunge
0,8176 D' glosen bedeutunge
0,8177 ch wil abir gehen vort
0,8178 Glosende uf disse wort
0,8179 Als sie da vor sin gehort
0,8180 Von bel . und des trachen mort
0,8181 Bel . ist uns zu beduten
0,8182 Vras . d' itzunt den luten
0,8183 Semfter tut dan die maze
0,8184 D' trache ist die saze
0,8185 Suntliches gutis gewin
0,8186 Daz alhie menschlichen sin
0,8187 Blendet uf zu v'gezzen
0,8188 Gotis . almusen . mezzen
0,8189 Vesper vasten ist u-mer
0,8190 Beten wachen ist zu swer
0,8191 Den . die die zwei hie lieben
0,8192 Wer sie von im wil sschieben
0,8193 Crefteclich . d' muz beten
0,8194 Bi cristo nahen treten
0,8195 So zihen sie von im sit
0,8196 David uf daz selbe quit
0,8197 Swelche gote getruwen
0,8198 Und veste in en buwen
0,8199 Den sunden sich hie tregen
0,8200 Die sint glich zu irwegen
0,8201 Sam d' berc syon nu ist

0,8202 Vurchte nicht des tuvels list
0,8203 Brich den vraz toete daz gut
0,8204 Halt zu gote steten mu
0,8205 Wand du must noch geben zol
0,8206 Swerlich in d' lewen hol
0,8207 Versuchende dich noch baz
0,8208 Ob du kein den sunde- laz
0,8209 Werdest d' da siben sin
0,8210 Toetlich . sich da wirt dir schin
0,8211 Nutzende gotis spise .
0,8212 dir ich den priest' wise
0,8213 Wesen . des ppheten hant
0,8214 Mit im so wirt dir gesant
0,8215 Trost in d' sunden kerkir
0,8216 Er sprichet messe vor dir
0,8217 Seynet ein brot wazzer win
0,8218 Cristes lib . sin blut rot fin
0,8219 Wirt werlichen alda gar
0,8220 Diz muz er d' engel schar
0,8221 Wil tragen . die da meden
0,8222 Dem menschen unde reden
0,8223 Vor en aldort daz beste
0,8224 Rischlichen sund' reste
0,8225 Vueret en uf dinen trost
0,8226 Din engel daz du irlost
0,8227 Werdest uz d' sund- blic
0,8228 Ruwe bichte nimet sic
0,8229 An dir von siner lere
0,8230 Dich spiset dan d' here
0,8231 Priestre mit des lebens brot
0,8232 Disse spise dich uz not
0,8233 Brenget d' vreisen lewen
0,8234 Hier uf so sprichet even
0,8235 David d' kunic besunder
0,8236 Gedechnis siner wund'
0,8237 Hat got ie an den getan
0,8238 Irbermede die en han
0,8239 In vorchten zu aller zit
0,8240 Riche spise er en git
0,8241 Vutende sie da mitte
0,8242 Nach sulcher sunden glitte
0,8243 Kumet d' ware kunic
0,8244 Marien sun sinen blic
0,8245 Wirfet er lieblich nach dir
0,8246 Suchende ob sine gir
0,8247 Si da dime lebne bi
0,8248 Vindet er dich danne vri
0,8249 Suntlicher begerunge

0,8250 Vro zut in ansprunge
0,8251 Sine gute dich uz we
0,8252 vur baz kumest u nicht me
0,8253 Zu d' tuvelichen trucht
0,8254 En wirt d' selben unzucht
0,8255 Gelonet mit d' helle
0,8256 Ewiclich ir gevelle
0,8257 Sal wesen in d' pine
0,8258 Clarheit mit uber fine
0,8259 Entsluzet d' drivalent heist
0,8260 Vater . sun . heilger geist
0,8261 Alle zit sam dri sunnen
0,8262 Doch einer(.)in d' wunnen
0,8263 Lebest u in ewikeit
0,8264 Paulus hat uf diz geseit
0,8265 Sulchen trost d' cristenheit
0,8266 Alhie ist uns Got gereit
0,8267 Sichteclich sam d' schimen
0,8268 Aldort sal uns gezimen
0,8269 Eigenlichen en an sen
0,8270 Lieplich in d' ougen bren
0,8271 Wunnende immer mere
0,8272 Sust hilfet dir uz sere
0,8273 Messyas als ich wise
0,8274 Salomon d' vil wise
0,8275 Beweret wol disse dinc
0,8276 Schribende sust den ursprinc
0,8277 Got v'suchet sine kint
0,8278 Glich golde daz man bevint
0,8279 Smeltzen in des ovens glut
0,8280 Gutlich er en wid' tut
0,8281 Dar nach wand er sie entpfet
0,8282 Dem opfer glich daz man set
0,8283 Inneclich in gotis schoz
0,8284 Vreu dich mensche du wirst
0,8285 Pinlicher not durch die man
0,8286 Genant cristes capelan
0,8287 Pfflich gewalt ich meine
0,8288 Ir wort dich machen reine
0,8289 Stetlichen von d' unvlat
0,8290 Selikeit durch sie entstat
0,8291 Ere sie daz ist min rat
0,8292 Diz glosel alhie uz gat
0,8293 Alhie volget genende
0,8294 Ein nachrede dem ende
0,8295 Lobit mit mir swer hie si
0,8296 Gotis muter die mir bi
0,8297 Ist gewesen meisterlich

0,8298 Daz nu Danyel durch mich
0,8299 Gemachet ist zu duten
0,8300 Wer diz ticht allen luten
0,8301 Anneme daz wer mir lieb
0,8302 Uz dem latin ich ez hieb
0,8303 Als ez an den worten stat
0,8304 Sulcher uzlegunge bat
0,8305 Der reine und d' wise
0,8306 Des urhab wol prise
0,8307 In keiserlicher bluete
0,8308 Von sines stammis guete
0,8309 Entsproz d' tugende vas
0,8310 Ely zabet die hie was
0,8311 Zu ungern des kunges kint
0,8312 Heilic ist sie worden sint
0,8313 Bi gote in ewikeit
0,8314 Disse vreude si bereit
0,8315 Im ouch durch iren willen
0,8316 Sie sal den viant stillen
0,8317 Ob er en noch vichtet an
0,8318 Ein vurste ist dirre man
0,8319 Geborn von des adils zwic
0,8320 Gekreirt d' von brunswic
0,8321 Bruder Luder . dem orden
0,8322 Ho meister hie geworden
0,8323 Genant d' dutschen heren
0,8324 Min gebet im sich meren
0,8325 Immer sal . durch d' hie ist
0,8326 Lesende zu aller vrist
0,8327 Mit den die da horen zu
0,8328 Bittende sit mit mir nu
0,8329 Innenclichen disse wort
0,8330 O h're d' engle hort
0,8331 Jhesu Criste warer Got
0,8332 Twach en von d' sunden mot
0,8333 Zuch im an des lebens cleit
0,8334 Sulcher wis daz er gemeit
0,8335 Muge wirdeclichen gan
0,8336 Vor dir uf des himels plan
0,8337 Amen . vor pinlicher we
0,8338 Bewar die . die disse vle
0,8339 Wenden an dich suzer crist
0,8340 Gib en daz brot daz du bist
0,8341 An irme letzten ende
0,8342 Ruwe bichte e sende
0,8343 Buze ob sie mac gesin
0,8344 Nim h're mich mit en in
0,8345 Da du wunnest immer me

0,8346 Lazet benedicite
0,8347 Gegeben swer d' hoeste si
0,8348 Got tu uns d' helle vri .
0,8349 AmeN ."